

cum el suo consejo, credo che el me saria bon bever de l' aqua de Abano, *cum* speranza de rehaven mia sanitate. Per le tre ditte cosse pertanto, lo ho mandato a la Illustrissima Signoria de Venetia uno gratioso et humel priego et rechiesta, et domandado uno franco et libero salvacondutto, *cum* el (qual) io seguramente possi venir a Venetia a trovar la signoria vostra, et *cum* quella alquanto star sotto quella medesima custodia et guarda che quella convien star, et *etiam* poder per la mia gran malatia haver consejo et aiuto da quelli boni et valenti medeci; la qual cossa fin qui da la Illustrissima Signoria non me è stà concessa, et credo solamente per le grande et diverse facende; ma pur ancora io son de ferma speranza, et cussi credo, che la Illustrissima Signoria et la sua grandissima potentia non me negerano tal gratia et honesta rechiesta.

108* In quanto a lo anello, gratioso et carissimo marito, io dico che quello anello che ha habuto missier Zuan Stefano Maza doveria esser stà fatto un poco più stretto de quello che era lo anello vechio, et haverge fatto far quelle letere che erano su la poliza dentro et de fora de lo anello, le qual parole danno risposta a le parole che la signoria vostra me ha mandà in lo altro anello, el qual anello lo ho apresso de mi, et holo voluto mandar a la signoria vostra aziochè la signoria vostra el volgi per amor mio et memoria portarlo; et però, cussi piacendo a quella la volgi far far, perchè de qui non se trova alcun bon orevese.

Anchora, gratioso signor et carissimo marito, secondo che la signoria vostra me scrive che li manda ancora uno par de linzuoli atiò quella se possi mudar, pertanto li mando uno par de quelli del suo letto de campo; et si quelli non fusseno al proposito per esser tropo grandi, over picoli, la signoria vostra me fazi intender, che lo li mandarò de li altri secondo il voler de quella; io non so *etiam* la grandezza over largeza de la letiera. *Item*, lo ho mandato a la signoria vostra, per el passato, uno par de calze de panno negro, le qual sono de panno grosso. Io non ho in quel tempo possuto trovar de melio, et si la signoria vostra ne volesse uno altro par, lo ho ordenado a missier Zuan Stefano Maza che, vojando la signoria vostra, lui me manda raso, veludo, over damaschin et pano per un par de calze. Et per tanto volgi la signoria vostra parlar *cum* lui et mandarme el tuto, che io farò far qualche cosa de bello a la signoria vostra.

Mando *etiam* al presente a la signoria vostra una letera del mio gratioso et caro fradelo conte

Ferdinando, et *etiam* una de Tomaso Socholeris; la qual letera era in questa mia malatia stà posta in le letere de Tomaso Socholeris, la qual io pur adesso ho trovata.

Jo me ricomando a la signoria vostra come a mio gratioso signor et carissimo marito *cum* ogni fede et humilità, pregando quella se volgi *cum* prudentia confortarse in queste sue adversità, perchè lo Onnipotente Dio et el tempo mandarà ogni cosa a bon fin.

Data a Blauburg, a dì 21 de Marzo 1515.

Gratioso signor et carissimo marito.

Habiandome scritto la signoria vostra de sua man propria per dar alegrezza a ogni mia tribulation et dolor, *cum* ogni humilità ringratio la signoria vostra et tegno tal scriver de vostra signoria sempre nel cor mio, et son molto alegrata del conforto de la signoria vostra che ella me manda, pregando la signoria vostra *cum* ogni obedientia et humanità quella se volgi et alegrar et star de bona voia, perchè io, in verità, non ho dubio alcuno in missier Domenedio, che la sua divina gratia drizarà ogni cosa a bon camino et finirà etc. Vostra fiola Anna Maria et la sorela, insieme *cum* le altre donzele, se ricomandano a la gratia vostra, et sapia la signoria vostra che *cum* li nostri priegii verso missier Domenedio devotamente per la Signoria Vostra etc. 109

Cum questo me ricomando a la signoria vostra, *cum* grandissima speranza che lo Omnipotente Dio presto ne conzonzerà insieme *cum* grandissima alegrezza etc. Si la signoria vostra vol arzenti over qualche altra cosa, me faza intender.

APOLONIA contessa de' FRANGIPANI.

Etiam, gratioso signor et carissimo marito, io mando a la signoria vostra una intimela, per la qual la signoria vostra me ha scritto, et una letera del mio gratioso signor et caro fradelo cardinal de Gurch.

A dì 8. Vene il capitano zeneral a la Signoria, per il qual fo mandato sier Piero Trun e sier Hirónimo Justinian savii a terraferma, et ditoli, per il Principe, la deliberation dil Senato, qual zà eri sera li fo mandato a dir. Sbufò molto, dicendo è desgratiato capitano, e cossa el dimanda non pol obtenir, et che la fede et operation sua verso questo Stado non lo merita; *tamen* è contento quietarsi, perchè 110